

Pita keba peba titi owera ie kimibiria urubia aboto

¹ Mo masiro Pita ie. Mo Iesu Keriso ro notiodorai-ro nou woko emesioidiro ri. Godi ro edi urubia girapoi-ro nou urubia to ararasoro ri, nedi peba titi ro mo ro nio aboto nisioidiro. Nio idaibo karaho urubia sosoro ie simara duriomoro keba ia se gemesere-rimo, musomuso duriomoro ato karaho urubia mino to orowomidiro. Nio arua Pontiasi duriomoro ato orowomidiro, arua Gereisia duriomoro ato, arua Kapadosia ato, arua Eisia duriomoro ato, arua nio Bitinia duriomoro ato orowomidiro.

² Abera Godi nu simara umoro to nio nou ro keba ia se ta-gihodowa nou urubia to ararasoro ri. Nou edi Tarena Urio ro nio abato edi woko ro na-isioidirotiti nio tarena neito iwaititi-die. Nio nou ro keba ia se ta-gihodowa nio ro Iesu Keriso ubi tanaro se kisioidiro aboto, ibose nio nou ro nou karima ro neito imese marea tato iwaititi ri. Godi edi wisa tato nirimagare ro miro mutu nio aboto momuo se nou ro ba-memagagawadotiti-ro.

Nimo Adiri sabowa ato anama-irowomidiro-ri

³ Nimo Abera Naramu Iesu Keriso nou simara abera Godi ie, nou nimo ro auna se memowabu-rimo! Nou auna nirimagare ie nimo aboto, ina noudo ie Iesu Keriso nou ro pamo rido na-gowameai-ro, abora nedi gabo ro noudo nimo ro kimaragoidiro to ti-niauri-dumo ibo orio keremiro nimo ro ta-nomidai-dumo. Abora

nimo ro nedi orio keremiro ro na-nomidai-dumo
nimo abato auna toititi.

⁴ Nimo Godi ro keba se ta-nihodowa Adiri
sabowa ato edi meana ro na-owamo-die
kirahidimai aboto, nedi meana ro kepuse gabo
tato ie, marea koi gabo tato ie, ibose nu sosoro
karatidiai gabo tato ie, mea sosoro imese aise
ama-owamotiti-ri. Nedi meana ro Adiri sabowa
ato iamo-die Godi ro nou nimasogoro-die.

⁵ Abera Naramu Iesu sapuwo to nio
na-gimibiria-rimo, ina noudo ie Godi edi
pupuwo korosa ro neito imowotoititi-die womu
tato, tau nama-orobai-ri nio Godi ro nani to nato
amadi-iapopo-ri. Nedi kiapopo tanaro ro Godi ro
keba se ta-gemododiai, womu saiki ato nou ro
paeapaea nato amadi-iwai-ri.

⁶ Neio sapuwo to nio auna kamade ro
ba-miwati. Morobise ie nio egea mere se mibo
maumo ato ta-woutiti-mo, erere koko kiwaibirio
tanaro ro nio abato na-ororosioirotiti-mo.
Kaupoti nio kamade ro kiwati modobo ie.

⁷ Nedi koko kiwaibirio tanaro ro nio abato
na-ororosioihiro-dumo, mabu mutu e. Nio edi
kimibiria ro paease nou ri ama-iwaibirio-ri ibo
nio morobise ra o bagea kimibiria urubia ra?
Nio edi kimibiria ro auna nakomu e, nu gorodi
sosoro pua womu to nama-ererede-ri, iedi
kimibiria ro womu tato womu tato nou ro
ama-owamotiti-ri. Mabu gorodi era to kitai ato,
nou marea era ro nato kiwagarewado ie, taie
nou sosoro aise karatidiai ie. Kaupoti nio edi
kimibiria ro gorodi sosoro pua. Iedi kiwaibirio
tanaro ro nio ro na-iauri-dumo, nio neio ro
iwapotaiddio-diumo ibo nio kimibiria morobise

ie. Iesu Keriso edi tau ato namadi-orowapotai-ri, nio nou ro ama-imowabu-ri, ibose auna masiro ama-imio-ri.

⁸ Iesu Keriso nio ro simara idomari to iauri pua sekere, kaupoti nu nio ro temododidiro-dumo. Iesu Keriso nio ro abora iauri pua, kaupoti nio kimibiria nou sapuwo to tiamo, ina noudo ie nio kamade ro tiwati. Iedi kamade ro auna kamade ie, urubia dubu ro owera to kemabuti gabo tato ie.

⁹ Nedi kamade ro mabu mutu e, nio ta-gimibiria-rimo ina nio edi keremiro ro Godi ro tiapopo-die. Nio nou mabu ato gimibiria-rimo.

¹⁰ Keba ia tau ato Godi edi ipusu owera urubia ro sirio owera erere tau ato ta-iwapotaidirotiti-mo, ibo nedi kiapopo tanaro ro nou sapuwo to Godi ro nio nirimagare ama-imowai-ri. Keriso ro edi Tarena Urio ro kebase ta-gemeiriai-ro Godi ipusu owera urubia aboto. Neio ro Tarena Urio edi owera ro maumo mea se iosoratiti-mo.

¹¹ Neio Tarena Urio ro ibo imowapotaidirotiti-ro, 'Ido Godi ro kohodowa dubu temeteme ama-iwia-ri, ina nou ro auna masiro ama-omidai-ri.' Neio ubi neito owamotiti ibo nedi tanaro ro beda tau ato amadimo-ororosioidiro-ri, ibose beda sosoro amadimo-ororosioidiro-ri, nedi owera ro maumo binio to nou osoratiti-mo.

¹² Godi ipusu owera urubia Keriso edi Tarena Urio ro nou ro imowapotaidirotiti-ro ibo nedi owera sirio ro ibo pua neio simara sapuwo to kimade, nio meana sapuwo to imadetiti-mo. Neio ro tagara tau ato gatamuai-rimo nedi

owera ro urubia na-imowautiti-mo. Ina abora, nedi mea owera ro Iesu sapuwo to nio ta-gimowauti-rimo. Mabu Tarena Urio Godi ro Adiri sabowa rido ta-gemeiriai-ro, ina neio ro nou edi pupuwo ro nouto imowautiti-mo. Nedi owera maumo ro sowake urio sirio neio auna ubi ro iamotiti umoro koi aboto.

Nio tarena to gi-owomidi-ro

¹³ Ina noudo ie nio modobo ie kimaragoidiro tuputupu se kiamo, tanaro patu durupi to mea se kisioidiro aboto, ibose modobo ie tanaro kisioidiro aboto korodiobuti mutu. Iesu Keriso edi tau ato nio aboto namadi-owateai-ri, nirimagare amadi-imowou-ri, ina nio nou aboto aise dirarowo-mo.

¹⁴ Nio Godi ro nou owera kirowidiro merebusere to giapoi. Ina noudo ie nio keba se edi ubauba ubi mutu gorowomidiro, abora idaibo sosoro orowomidiro mamo. Nio keremiro modobo pua ubauba ubi tanaro ro kimeruti.

¹⁵ Nio edi dubu ro girapoi-ro nou urubia to ararasoro ri, nu imese tarena ia dubu e. Ina noudo ie nio ro beda tanaro kisioidiro ra, nou sosoro ba-dirowomidirotiti tarena mino to.

¹⁶ Mabu owera Tarena Buka ato towamo ibo, 'Mo tarena ie, ina noudo ie nio tarena to ba-dirowomidirotiti.'

¹⁷ Nio Godi aboto kararatoro ato, nou sirio tau nio ro abera to ororutiti-dumo. Nimo ro erere woko nato na-nisioidiro-dumo, nimo wisa nou ro erere se nimohodutiti-die, simara modobo ato nimohodutiti-die. Ina noudo ie nio nedi sopu duriomoro nato na-owomidiro, nio apira urubia sosoro ba-dirowomidiro. Nio ro Godi aise demododidiro-mo,

¹⁸ mabu nio umoro ta-goi-rimo ibo duriomoro namabu idaibo siriba, gorodi mutu, neio womu to amadime-ereredeai-ri, ina idaibo namabu to nio Godi ro neito iahodorai pua. Nio edi keba korowomidiro muro ro simara nasa naminami aboudo na-gimade-rimo, nio nouto ta-gorowagumaidiro-rimo. Kaupoti nio Godi ro ioudo ta-giahodorai-ro,

¹⁹ nou ro Keriso edi karima ro nio neito giahodorai. Iesu edi karima ro na-gisuputi imese auna wisa namabu e, nio Godi ro neito giahodorai. Iesu sipisipi dawade sosoro ie, nu imese modobo ia dubu e.

²⁰ Nu Godi ro keba se gohodowa-ro sopu duriomoro kosioidiro tato moro ato. Kaupoti nu Godi ro nedi sopu duriomoro ro neito aise gemeiriai-ro nedi iana tau ro nato nio iwarebai ri.

²¹ Ina nio Godi oweri ta-gimibiria-rimo, mabu Iesu ro edi tanaro ro gosioidiro. Godi ro Iesu pamo rido ta-gowameai-ro, taie iedi tau ro nato nu Godi ro auna masiro aise gomia. Ina noudo ie nio kimibiria tiworohuti-dumo Godi sapuwo to, ibose nio auna se imaragoidiro-dumo ibo nou ro beda oweri karo ra, aise kisioidiro ie.

²² Nio ro kimibiria naminiramio morobise nirimagare imati-dumo. Keriso edi morobise oweri ro nio ro morobise to obodoroutiti-dumo, ina nedi tanaro ro neito nio niro turi marea tato nakara se gorowaititi-rimo. Ina noudo ie nio abato morobise nirimagare aise ba-mowamotiti nio korowarebai aboto.

²³ Mabu nio nirimagare keremati sapuwo to, ata mabu nou e, nio idaibo urio to orio kirotuti

sosoro ie, orio keremiro ta-gimidiai-rimo. Nedi orio keremiro ro ibo pua nio abeamio ro kimio, mabu nedi keremiro ro saiki ata ama-araraseperai-ri. Kaupoti Godi edi owera ro nou edi keremiro ro karaseperai gabo tato ie. Nedi orio keremiro ro Godi edi mea owera ro nio ro neito gowea-rimo. Nedi mea owera ro nu keremiro mutu e, nou ro eremirotiti imese sirio tau aise owamotiti.

²⁴ Mabu owera Tarena Buka ato towamo ibo, *Imese urubia sugamuso sosoro ie. Neio edi awawo masiro ro kakamu sosoro ie, saiki ro na-iwia aise kitemeriawado ie, tuturu tau to orowotoi-ri pua.*

²⁵ *Kaupoti Abera Naramu edi mea owera ro pamo tato ie, womu tato womu tato ibose to owamotiti.*

Ina nedi mea owera ro nio kebase na-gimowauti-rimo nou se ie.

2

Iesu keremiro nadi ie

¹ Ina noudo ie, imese korohoio tanaro sirio aise ba-diware-mo idaibo, urubia kisaubuti, meana to karatigi, masawe kerereauri, urubia owera to ubauba kiwaititi.

² Kaupoti orio kiroto bamuai kainakaina beda sosoro ra, neio auna ubi ie nono isi kidio, nedi nono isi ro nato ata ubauba ata owamo pua. Ina nio idaibo sosoro korowomidiro modobo ie, Godi edi owera ro nou sogoi ro kiwati kiroromowado sapuwo to, womu tato nio Godi ro nato amadi-iapopo-ri.

³ Mabu nio ro nakara se ta-giauri-rimo ibo, Abera Naramu nou meana ie.

⁴ Nio Iesu Keriso aboto aise dou-rimo, nou nadi sosoro ie, keremiro nou abato towamo. Urubia sirio nedi keremiro nadi ro ta-iaurititi-mo sekere, kaupoti nou neio ro ubi tato to asorotiti-mo. Kaupoti nedi mea ia nadi ro, Godi ro keba ia se gohodowa moto ididi na, nou ubi nadi ie.

⁵ Nio abora etio ro ararasoro-dumo kimibiria urubia to, nio keremiro nadi sirio sosoro ie. Nio moto kididi namabu e, nou ro nio to urio to ididi rie. Nedi moto ro abora Godi ro tididi, ina nedi moto ro nato nio Godi ra urubia ra tarena turi urubia to ararasoro rie. Ina noudo ie iedi moto ro nato nio ro kiwoubua namabu urio to amadima-imatowo-ri, idaibo nio keremiro momuo se Godi aboto kiaiwo. Nio ro edi kiaiwo namabu ro namadimi-iaiwo-ri, Godi ro kamade mutu ama-imade-ri. Mabu nedi gabo ro Iesu Keriso ro keba se ta-gosioidiro.

⁶ Ina Tarena Buka ato ower a ibo owamo, Godi ro ibo, *Owera neito ma-dirowidiro-mo, mo ubi turimida nadi posi moto koko se kowotoi aboto, Ierusarema podo ato noti nowotobowa. Etio ro orodoromaidiro-dumo nedi turimida nadi posi ro nato, neio iretuti-ri pua, ina siripo ro iwati-ri pua.*

⁷ Ina noudo ie nio kimibiria urubia to na-wararasoro-dumo, nedi nadi ro nio sosoro gabo ato na-owamo imese auna ia nakomu e, ina imese meana ia ie. Kaupoti kimibiria tato urubia sapuwo to, ower a ibo ie neio aboto, *Nedi mea nadi posi ro moto kididi urubia ro ubi tato to na-wasorotiti-mo, nadi posi ia nou se ie, moto nou ro gadiouti.*

⁸ Ina ibose Godi ipusu owera dubu Aisaia owera nou ro kebase ta-gosioidiro kimibiria tato urubia sapuwo to ibo, *Nedi nadi ro urubia sirio nato irohumotiti-dumo.*

Neio nadi ato nou ri irohumotiti-dumo, mabu neio ro Godi owera Iesu Keriso sapuwo to durupi to isioidirotiti pua. Neio Godi ro kebase ta-giapoï nedi kirohumo tanaro ro neio aboto ororosioidiro ri.

⁹ Kaupoti nio timase ie, nio Godi urubia ie, ina nio nou ro kebase girapoï-ro nou gu urubia to ararasoro ri. Godi nouse ie nio eputa dubu, ina nio nou turi urubia ie. Nio tarena urubia ie, ina nio Godi ro nou ia urubia to giapoï. Nio idaïbo sosoro urubia to Godi ro nou ri girapoï, nou nio ro owauti ri nou ro beda meamea tanaro gisioidiro. Nio nou ro giwosuruwo-ro duwoduwo maumo rido, abora nou edi mea ia woroworo ro nato orowomidiro.

¹⁰ Keba se nio kaupoti patu to ararapoï pua. Kaupoti nio abora Godi urubia ie. Keba se nio Godi aboudo nirimagare tanaro iaurititi pua. Ina abora ibo pua, nou aboudo auna nirimagare tanaro nio ro ta-gowea-dumo.

Meamea tanaro se gi-isioidi-ro

¹¹ Namuturubi nirimagare babio. Nedi sopo duriomoro ro nio nato na-orowomidiro nio duriomoro pua, nio karaho urubia sosoro orowomidiro, nio suwa duriomoro ato sosoro orowomidiro. Ina noudo ie nio mo ro a-nimagege ubauba ubi tanaro durupi to aise isioidiro mamō. Iedi ubauba ubi tanaro sirio ro boso neio ro iworoho-dioumo nio keremiro aboto.

¹² Godi umoro tato urubia abato meamea tanaro se gi-isioidiro-ri. Nio sapuwo to neio ro bagea oweru karo ie ibo, 'Nio ro ubauba tanaro tisioidiro-dumo.' Kaupoti nio ro edi meamea tanaro ro namadimi-isioidiro-ri, neio ro amadimi-iauri-ri, ina noudo ie Keriso edi tau ato namadi-orowameai-ri Godi neio ro aise amadime-emowabu-ri.

Modobo ie eputa urubia oweru kirowidiro

¹³ Abera Naramu masiro auna kowaititi sapuwo to, imese urubia masiro mutu na-orowomidiro urubia kiauri sapuwo to, nio ro modobo ie neio oweru se kibodoro. Ibose iedi eputa dubu ro ohu ato na-omidiro-die, masiro Sisa,

¹⁴ ina iedi eputa urubia ro erere duriomoro nou sapuwo to na-emeauri-dumo, neio oweru se ba-dibodoro-mo. Neio Roma sabowa gebari edi ohu eputa dubu ro Sisa nou ubi ato irowomidiro titi eputa urubia to, ina nou ro gimerio-ro nio aboto, ubauba tanaro kisioidiro urubia neio ro ubauba wisa simara modobo ato kimio aboto, ibose meamea tanaro etio ro isioidiro-dumo, neio imowabu rie.

¹⁵ Nio ro modobo ie meamea tanaro kisioidiro. Mabu kimaragoidiro tato urubia ro umoro tato oweru karo ie nio sapuwo to. Ina Godi ubi ie meamea tanaro nio ro kisioidiro ato, neio oweru karo aboudo nio ro neito kidiobuti ie.

¹⁶ Kibase nio Satani edi pupuwo maumo ro nato ta-gorowomidiro, kaupoti Iesu edi pupuwo ro neito nio nou ro aise gimapoduti-ro. Ina noudo ie kimapoduti urubia beda mino to korowomidiro ra, nio idaibo mino to

ba-dirowomidiro. Modobo ia pua nio idaibo kimaragoidiro kiworohuti, 'Nimo ubauba aboudo ta-niwagare-ro, nimo ubauba ro abora seni sosoro irobidiro pua.' Nio dorogora se namadimo-oroho-ri ina ubauba tanaro erere se kisioidiro ato, ubauba ie! Godi edi sowake urubia ro beda sosoro korowomidiro ra, nio idaibo sosoro ba-dirowomidiro.

¹⁷ Imese urubia mea mino to aise gi-iworohuti-ri. Kimibiria naminiramio nirimagare aise ba-dimati-mo. Godi nio ro aise demododidiro-titi-mo. Auna gabamani eputa dubu Sisa nou mea mino to aise gi-oworohuti-ri.

Iesu temeteme beda sosoro giwia nio ibo kiauri modobo ie

¹⁸ Wisa tato woko urubia, nio edi eputa urubia ro iauro-dumo, neio ubi woko aise gi-imesioidiro-ri, kimododidiro mutu. Nio mea se beda eputa urubia ro iworohuti-dumo miro tanaro na-iwapotaidiro-dumo, ibose karasaubuti mino to beda eputa urubia ro iworohuti-dumo, wisa meamea tanaro neio aboto atu se aise gi-isioidiro-ri.

¹⁹ Mabu urubia ro didi poro to temeteme na-iauro-dumo, Godi sapuwo to na-imaragoidiro-dumo, ina nedi temeteme ro nou maumo ato neio koko se na-orowotoi, io idaibo tanaro neito Godi neio ro kamade kowaititi ie.

²⁰ Kaupoti nio simara ubauba tanaro sapuwo to na-iado-dumo, ina nio koko se na-orowotoi, nio ro nou sapuwo to mea wisa beda sosoro kowea ra? Kaupoti nio ro ubauba tanaro kisioidiro tato, ina eputa urubia ro didi mabu

ato nato na-iado-dumo, nio Godi sosoro gabo ato meana ie, ina nou nio ro kamade kowaititi ie.

²¹ Nio Godi ro girapoi-ro idaibo temeteme maumo ato orowomidiro ri. Mabu Keriso nio sapuwo to idaibo temeteme ta-giwaubere. Nou ro edi tanaro ro na-gosioidiro nio ro ioudo aratamudi ro rie, nou edi mino ro nou obodoro rie.

²² *Nou ro ata ubauba ata tu to owasomai pua, nou matagoro rido ata karasaubuti owerata osuruwo pua.*

²³ Nou urubia ro owerata to ubauba na-gowaititi-rimo, neio nou ro wisa imowame pua. Nou ubauba temeteme na-gomia-rimo, nou ro utura pua ibo, 'Nio mo ro wisa ubauba anama-iwai-ri.' E e, nou abato kimibiria kawakawa ro gowamo. Ina noudo ie nou keremiro aise gapoi, ina Godi tu ato aise gedea. Mabu Keriso umoro ie ibo Godi nou tuputupu koto kiauri dubu nouse ie.

²⁴ Keriso nou se ie nimo edi ubauba sirio ro nou ro simara durupi to giratai ota kemowotowa teibo ato. Nou ro nedi tanaro ro nou mabu ato gosioidiro, nimo pamo urubia sosoro irobu rie, ubauba tanaro sirio kisioidiro sapuwo to, ibose nimo edi meamea tanaro kisioidiro aboto orowomidiro rie. Nou durupi ato edi ikoni ro giamo, nio meana neito goi-rimo.

²⁵ Mabu nio sipisipi sosoro gararaseperai-rimo tima moro ato na-irohotiti-mo, ina nio nou aboto ta-gerewesegere-dumo. Nio edi sipisipi kimowotoi dubu ro nou aboto ta-gorowame-dumo. Ina nou nio keremiro kiauri dubu nouse ie.

3

Orobo ra uramu ra totomu nitiro sapuwo to ie

¹ Ina ibose, oweru ama-ou-ri uramio ra mutu mamio, nio aboto. Nio simara uramio mea mino to kimododidiro modobo ie. Nio ro idaibo tanaro namadimi-isioidiro-ri, arua kimibiria tato uramio nio aboto na-irowomidiro, modobo se kowamo ie kimibiria upi nio edi mea korowomidiro muro ro oweru tato se neio nio ro kiwesegere ie Iesu Keriso edi mea gabo ro neito.

² Mabu nio neio ro kieibimo ie tarena muro to korowomidiro ato, ibose nio ro mea mino to na-imododidiro-dumo.

³ Nio edi mea sosoro ro ohu durupi rido kou modobo pua. Auna se imaragoidiro mamio parasi parasi koroho aboto, sobo meana kiwaititi aboto, ibose awawo wisa sowio namabu kiroidiro aboto auna se imaragoidiro mamio.

⁴ Kaupoti nio niro turi ato edi meana ro iamotiti, nio ro durupi to nou ri iwapotaidirotiti-dumo. Idaibo meana nio aboto aise kiamo modobo ie. Nio niro turi ato mea muro, miro mutu ba-miamotiti-ma. Iedi meana ro koroporeai gabo tato ie, Godi sosoro gabo ato auna nakomu e.

⁵ Mabu tarena mamio keba se na-gorowomidiro, kimibiria Godi sapuwo to na-iworohutiti-mo, neio mea sosoro idaibo mino to gorowaititi-rimo. Neio uramio aise imododidiro-ri-mo.

⁶ Sera idaibo orobo ie, nou uramu ro beda oweru iarotiti, nou ro durupi to aise isioidirotiti. Ibose nou ro uramu simara eputa dubu to asorotiti. Nio beda mamio ra meamea tanaro

tere tato na-isioidiro-dumo, nio idaibo Sera busere ie.

⁷ Ina atu sosoro kitamudiro ower a kimibiria uramio nio aboto ibo ie. Nio upi mutu na-orowomidiro, nio ro sirio tau neio ba-dimaragoidiro-titi-mo, nio ro beda mino to amadimi-iwarebidiro-titi-ri. Upi nio ro sirio tau mea mino to aise gi-iworohuti-ri. Pupuwo nio abato giporeai, upi nio sosoro pua neio pupuwo awawo pua. Uramio upi nio ro aise gi-imododidiro-ri. Mabu upi dubu nio atu se Godi abato edi keremiro ro owamo-die, nio ro wisa tato nou amadimo-omidai-ri. Uramio ro nedi gabo ro mea se namadimo-obodoro-ri, nio kararatoro tau ato, Godi ro nio kararatoro ower a modobo ato kimewidiro ie. Ina Godi aboudo nio ro mea wisa kowe a ie.

Meamea tanaro gi-isioidiro-ri arua urubia aboto

⁸ Abora mo ubi ie nedi ower a ro na-nimowauti nato koporeai, nio kaupoti kimaragoidiro mutu korowomidiro modobo ie. Abora mo ubi ie nio kimibiria urubia imese sirio se korowarebai tanaro kisioidiro naminiramio korowarebai beda sosoro ra, idaibo mino to korowarebai modobo ie. Arua kimibiria urubia aboto nirimagare tanaro aise gi-isioidiro-ri. Sopa to aise gi-orowororuwoidiro-ri.

⁹ Ata dubu ata ro ubauba tanaro ata na-osioidiro oro aboto, nou wisana ubauba to emowameai mam o. Ibose ata dubu ata ro oro ubauba ower a na-omio, nou wisana oro ro ubauba ower a to emowameai mam o. Kaupoti oro ro Godi gi-araratoro-ri korosa nou aboto aiwai ri. Nio Godi ro nou sapuwo to girapoi-ro.

Ina nedi mea tanaro ro nou kisioidiro nou mabu ato nio Godi ro meamea wisa nato ama-imio-ri.

¹⁰ Mabu owerā Tarena Buka ato kebase ta-gisioidiro-rimo ibo, *Urubia dubu ubi na-owamo mea se komidiro aboto, nu matagoro kemododiai modobo ie. Karasaubuti owerā nou matagoro rido kosuwoduti modobo pua.*

¹¹ *Nou modobo ie ubauba tanaro kisioidiro aboudo ba-maragarewado, ina meamea tanaro se kisioidiro. Nou modobo ie sirio tau korowaibirio miro pupuwo to kosora.*

¹² *Mabu meamea tuputupu urubia neio Abera Naramu ro timowotoititi-die. Ibose neio edi kararatoro owerā ro Abera Naramu ro timewidiroititi-die. Kaupoti ubauba tanaro kisioidiro urubia neio Godi ro nasa urubia to iasorotiti-die.*

Meamea tanaro kisioidiro sapuwo to nio temeteme kiauri ie

¹³ Nio abato auna ubi na-iamo tuputupu tanaro kisioidiro aboto, nou sapuwo to nio ubauba beda urubia ro amadimi-iwai-ri?

¹⁴ Nedi meamea tanaro ro nou sapuwo to nio ro ubauba temeteme kiauri sekere, kaupoti nio meamea wisa Godi aboudo kiwia ie. Nio ubauba beda urubia ro iwaititi-dumo, neio tere imati mamo, ibose siriosirio kimaragoidiro nio abato iamō mamo.

¹⁵ Kaupoti nio niro turi ato Keriso Abera Naramu to nouse dapoi-mo. Nio modobo ie sirio tau keremododiawado, urubia kimodowa owerā kimowame aboto. Ina nio ata ro kimodowa ato ibo, 'Mabu boira nio Keriso abato kimaragoidiro na-iamotiti?', nedi urubia ro wisa kimowameai aboto wisa paea se kiamo ie. Kaupoti neio wisa

owera nio ro kimowame ato, mea muro to gi-imowame-ri.

¹⁶ Modobo ie nio mea se korowomidiro, ina nou mabu rido nio keremasibai ibo, 'Nimo ro ubauba tanaro isioidiro pua.' Ina noudo ie nio urubia ro owera to ubauba na-iwaititi-dumo, mabu nio Keriso ubi tanaro isioidirotiti-dumo, saro to neio siripo koi ie. Mabu nio ro ubauba tanaro isioidiro pua, meamea tanaro isioidirotiti-dumo Keriso na-obodoro-dumo.

¹⁷ Godi ubi ato, nio ro temeteme amadimi-iauri-ri meamea tanaro kisioidiro sapuwo to. Io, Godi sosoro gabo ato ata ubauba tato ie nio ro idaibo temeteme kiauri aboto. Kaupoti nio simara ubauba tanaro sapuwo to temeteme nato na-imade-dumo, modobo ra? E e, modobo ia pua!

¹⁸ Keriso beda tanaro gosioidiro maumo nio ro mea se a-gowea-dumo ra? Nou kaupoti tau to imese garaburai urubia ubauba kimatopeamuti sapuwo to. Nou mea tuputupu tanaro dubu e. Nimo ro nedi kerewaekerewae tanaro sirio ro na-nisioidirotiti-dumo, temeteme nimo bobo ato nou ri gimidai. Nedi gabo ro nou ri gosioidiro nimo Godi aboto nou ro neido iwou rie. Nou durupi urubia ro gopia-rimo. Kaupoti nu Tarena Urio to gowameai-ro keremiro to.

¹⁹ Ina nedi urio keremiro ro nouto aise gou dibura ato edi urio ro gorowomidiro neio owera imowauti ri.

²⁰ Neio keba ia se Noa edi tau ato gomidiro, Godi edi ubi tanaro ro neio ro a-gebesiai-rimo. Ina neio Godi ro ubauba tau se iwai pua, serawo samo to oi pua, nou ta-eremasebidirotiti neio

ubauba kimeserai aboto. Kaupoti neio ro ubauba imeserai pua. Ina iedi tau ro nato Noa ro bokose pe na-ididititi, ina nedi bokose pe ro neito sipu tato urubia ro godoro-birimo, 8 urubia obo damo ato keremiro neibi ro giwia-birimo.

²¹ Nedi obo damo ro ata maumo owauti-die ibo obo to kiwarumiauti. Ina nedi obo to kiwarumiauti tanaro ro pikisa owera ibo owamo, nio abora ubauba aboudo nou ro iapopo-die. Nimo nedi sopu durupi ro na-niwarumiautiti-dumo maumo ibo owamo pua durupi rido marea kiwiouti. Nou pua io, Godi aboto nio ro amadima-aro-ri ibo mea ia se anama-irowomidiro-ri, keremasibowado aboto ibo nimo ro ubauba tanaro isioidirotiti pua. Iesu Keriso bobo rido na-geribua-ro nio nou ro neito iapopo-die.

²² Nedi dubu ro Iesu Keriso Adiri sabowa to nou ro godoro, abora Godi edi tumodi sapuwo ro nato auna gabamani to ohu ia to nou ro imidirotiti-die. Ina imese sowake urio sirio, erere orora pupuwo mutu na-irowomidiro-ri, neio Iesu owera se kirowidiro ie.

4

Ubauba tanaro dimesere-mo, meamea tanaro se disioidiro-mo

¹ Keriso durupi to temeteme ta-giwi. Ina noudo ie nio ibose mea se ba-dimaragoidiro-mo nou beda mino to goroho. Nou edi kimaragoidiro ro na-iworohutiti, nio ro idaibo sosoro kimaragoidiro ibose ba-diworohutiti-mo. Mabu etio ra temeteme na-iauri-dumo, ubauba

tanaro sirio morobise to neio ro
ta-gimesere-rimo kisioidiro aboto.

² Ina noudo ie nedi tau kainai ro nato
duriomoro ato nama-irowomidiro-ri, Godi ubi
tanaro se kisioidiro aboto ama-irowomidiro-ri,
ubauba tanaro ina isioidiro-ri pua, ubauba
urubia ro na-isioidiro-dumo iedi ubauba tanaro
ro.

³ Mabua nio kebase Godi umoro tato
na-irowomidiro-titi, nio ro auna tau dorogora
mabu ato goporeai-rimo. Godi umoro tato
urubia neio ro edi ubauba tanaro ro nou
isioidiro-titi-dumo, soka tanaro kisioidiro, auna
sogoi ro kiwati ie ubauba tanaro kisioidiro
aboto, neio kidio karadabu aboto soka tanaro
kisioidiro, ina orora kiroru. Godi edi sabi mako
ro neio ro ta-gemadauriai-rimo.

⁴ Ina nedi tau ro nato kimibiria tato urubia nio
abato na-owomidiro boroboro ro girobai,
mabu nio aradabu pua neio aboto, iedi durupi
ubauba ubi tanaro sirio ro kisioidiro aboto. Ina
noudo ie nio owera to neio ro nou ri
iwatiti-dumo.

⁵ Kaupoti nedi urubia ro neio ro iedi ubauba
ro na-isioidiro-dumo, Godi ro womu saiki ato
koto aboto ama-iwou-ri. Nou ta-geremododiai
nu edi koto kiauri woko ro nou ro osioidiro ri.
Korowaburo urubia, korowomidiro urubia
mutu, neio koto atu se ama-iwai-ri.

⁶ Pamo urubia keremiro kebase
na-gorowomidiro, kowasoro urubia ro neio mea
owera ta-imowautiti-mo. Nedi tanaro ro nou
mabu ato gorosoioidiro-rimo neio ro nedi mea
owera ro kimibiria aboto, taie neio aise
gorowaburo-rimo. Ubauba tanaro neio ro
durupi to ta-gisioidiro-rimo, ina wisana pamo

aise giauri-rimo, sopu duriomoro urubia aboto beda sosoro to ororosioi-di-ro-dumo. Kaupoti nedi kimowauti tanaro ro nou mabu ato gisioi-di-ro-rimo, kirowidi-ro urubia neio urio keremiro se korowomidi-ro aboto, Godi beda sosoro omidi-ro.

⁷ Tau aupiaupi ro orobowado-die imese namabu patu womu to kererede-a aboto ie. Ina noudo ie nio kimaragoidi-ro patu mea se miamo, ibose tanaro kisioidi-ro ato modobo ie kororodiobuti, nio Godi aboto kararatoro ower-a mea se karo aboto.

⁸ Auna tanaro nou e, nirimagare aise gi-eremati-ri. Mabu nio ro nedi nirimagare ro na-owawutiti-dumo, nio edi ubauba sirio ro nou ro neito ama-imatopeamuti-ri.

⁹ Nio moto to kimibiria borubi kamade mutu aise gi-imaidodoro-ri, muhoio ower-a aro mamo.

¹⁰ Tarena Ur-io ro nimo kaokao se modobo niwaititi-die erere tanaro kisioidi-ro aboto, ina nedi erere tanaro ro urubia nio ro neito mea se ba-diwarebai-mo. Ina nedi erere tanaro ro kisioidi-ro aboto urubia mea se neito diwaboi-mo.

¹¹ Etio ra ower-a nio abato na-imowauti-dumo, Godi simara ia ower-a ba-dimowauti-mo. Godi urubia kiwarebai tanaro etio ro isioi-di-ro-titi-dumo, neio ro ba-misioi-di-ro-mo Godi edi pupuwo ro neito. Ina noudo ie imese sirio tanaro urubia ro kisioidi-ro ato Iesu Keriso edi pupuwo ro neito, nou sapuwo to urubia sirio ro Godi amadime-emowabutiti-ri. Imese pupuwo korosa, auna masiro mutu nou do ie, womu tato womu tato aise towamotiti. Ibose ba-mororosioi-di-ro.

Iesu urubia temeteme kiauri sapuwo to ie

¹² Namuturubi nirimagare babio, era sosoro edi kiwaibirio tanaro ro nio aboto na-oroho-dioumo, nio boroboro nato oi mamu. Idaibo kimaragoidiro iworohuti mamu ibo, 'Aborabora tanaro ro ororosioidiro-dioumo nimo aboto.'

¹³ E e ibo pua, nou ibo ie nio abato kamade ro se kowamo modobo ie, mabu Keriso ro idaibo temeteme ta-giauri ina abora nio ro nou iauro-dumo. Keriso gebari pere ie, nou sosoro namadi-orowaweari, nio auna ia kamade ro ama-iwatariri.

¹⁴ Nio Keriso na-owasoro-dumo, ina nou sapuwo to nio urubia ro ubauba owera namadimi-imio-ri, nio ro Godi aboudo meana kiwia ie. Mabu Godi edi Tarena Uriro ro auna masiro na-orobidiro, nou nio abato tomidiro.

¹⁵ Modobo pua nio ro ubauba tanaro kisioidiro, idaibo urubia kiopiauti, piro tanaro kisioidiro, ubauba tanaro auna se kisioidiro, arua urubia tanaro aboto punugo se kiwaumudirio, ina neio sapuwo to temeteme kiauri.

¹⁶ Kaupoti nio ro temeteme kiauri ato mabu nio Keriso kowasoro urubia ie, siripo nato oititi mamu. Godi auna se ba-demowabu-mo, mabu nio abato Iesu Keriso edi masiro ro tiateidiroiti.

¹⁷ Abora tau ro orobowado-die Godi ro imese urubia koto kiwai aboto, nou ro koto edi tau ato nama-iwai-ri, nou ia simara urubia aboudo ama-aratamuai-ri. Nimo abato nedi tanaro ro kebase namadimo-ororosioidiro-ri, ina Iesu Keriso owera kimibiria tato urubia neio Godi ro beda mino to ama-iworohuti-ri?

¹⁸ Ina Tarena Buka ato owera ibose towamo, *Meamea tuputupu tanaro kisioidiro urubia keba se koko tau sirio neio ro amadimi-iauri-ri, ina ido neio Godi ro nato amadi-iapopo-ri. Ina Godi tere kemati tato urubia, arua ubauba tanaro kisioidiro urubia mutu, neio nou ro beda mino to ama-iworohuti-ri? Modobo ia pua, neio imese moro to amadima-araraseperai-ri.*

¹⁹ Ina noudo ie Godi ubi ato temeteme etio ro iauri-dumo, modobo ie neio Godi tu to kereredeae. Nou ro beda owera karo ra aise kisioidiro ie, nou nimo kisioidiro dubu nouse ie, ina nimo ro modobo ie meamea tanaro aise kisioidiro.

5

Muro owera Iesu urubia kemeauri urubia sapuwo to ie

¹ Iesu urubia kemeauri urubia nio abato na-orowomidiro, mo aboudo owera ibo ie nio aboto. Mo ibose Iesu urubia kemeauri dubu e. Iesu Keriso temeteme edi tau ato giwia, nou mo ro simara idomari to ta-niauri. Keriso gebari pere ie, nou sosoro namadi-orowawea-ri, mo, nio mutu, nimo atu se auna masiro Godi aboudo anamadimo-omidai-ri. Ina noudo ie nio mo ro binio to a-nimadowerai, pupuwo owera nio aboto ibo ou-die.

² Sipisipi kimowotoi urubia sipisipi mea mino to na-imowotoititi-dumo, Godi urubia nio ro idaibo mino to kimowotoi modobo ie. Nedi urubia ro neio Godi ro nio aboto giapoi-ro nio ro mea se emeauri rie. Nio ro nedi kemeauri woko ro morobise ubi mutu ba-demesioidiro-mo, Godi ubi beda sosoro owamo-die, ibo pua nio

kimagege. Ibo pua mani aboto kimaragoidiro, kemeauri woko mea se nato kosioidiro kamade mutu.

³ Nio ro edi sipisipi emeauri-dumo modobo pua nio ro owera to kiworohuti. Kimibiria urubia ro namadimi-iauri-ri nio edi meamea tanaro ro, neio ro nio mea se nato amadimi-imatiouti-ri.

⁴ Ina noudo ie sipisipi kiwabo i auna dubu Iesu beda tau ato namadi-orowameai-ri, nio imese sirio se nou ro meana ia eputa dubu hato nato ama-iwoiti-ri. Nedi hato ro ubauba koi modobo pua, nanito nanito aise ama-iamotiti-ri nio abato.

Muro owera kimibiria urubia aboto

⁵ Ina ibose pupuwo owera orio urubia nio aboto ibo ie. Iesu urubia etio ro emeauri-dumo, neio owera aise gi-irowidiro-ri. Ibose nio keremowabu tato mino to ba-doroworohuti-mo. Mabu owera keba se ta-gisioidiro-rimo Tarena Buka ato ibo, *Godi ro keremowabu urubia gabo imoputi-die, kaupoti nou ro keremowabu tato urubia aboto wisa tato nirimagare auna ia se iaiwotiti-die.*

⁶ Ina noudo ie nio modobo ie sopu to korowororuwoidiro, Godi edi pupuwo korosa ro nou maumo ato, Godi simara ubi tau ato nio nou ro ohu to kiwioro aboto. Nio nou ro auna nirimagare timatiti-die.

⁷ Ina noudo ie nio beda mutu mibo patu ro iamo, Godi aboto se ba-diaiwo-mo.

⁸ Mea se! Tanaro kisioidiro maumo ato modobo ie kororodiobuti, ibose kiraroweauti modobo ie. Nio nasa dubu Satani serawo tumu

na sosoro ie, serawo iamo mutu iapeidirotiti urubia iho rie.

⁹ Ina noudo ie kimibiria to koko se ba-dorowotoi. Satani edi ubi ro binio to ba-demowabeouti-mo. Mabu nio umoro ta-goi-rimo keba se ibo, nio kimibiria naminiramio sirio duriomoro ato na-orowomidiro atu sosoro temeteme tiauri-dumo.

¹⁰ Ina abora nou ba-demaragoidiro-mo nio egea mere se mibo maumo ato amadimo-ou-ri. Godi imese wisa tato kiwarebai dubu e, ido nio nou ro modobomodobo nato ama-iwaititi-ri. Nio nou ro koko se ama-iwotoburio-ri, ina koko iato ama-imowaititi-ri. Nou ro girapoi-ro nedi womu tato womu tato meana ro iwamo-die, Iesu Keriso aboudo nio ro nou kimidai aboto.

¹¹ Imese pupuwo korosa womu tato womu tato nou abato ba-mowamotiti. Ibose ba-mororosoidiro-mo.

Pita iana kamade ower a ie

¹² Nedi peba titi kainai ro mo ro nisioidiro, ina mo Sairasi ro nowarebai. Mo umoro ie ibo nou ro beda ower a karo ra aise kisioidiro ie. Nou mo kimibiria neama ie. Mo ro nedi peba titi ro nou mabu ato nisioidiro, mo ubi ie nio sirio tau Iesu Keriso sapuwo to kimibiria tanaro pupuwo kiwaititi. Mo ro beda ower a nisioidiro Godi edi wisa tato nirimagare ro nou sapuwo to, io morobise ower a nou se ie. Koko se nato ba-dorowotoi, huru to orowame mamo.

¹³ Nedi urubia ro Godi ro ibose na-girapoi ina Babironi sabowa ato na-orowomidiro, neio ro emeiriai-dumo kamade ower a nio aboto. Ibose mo edi mere ro Mareko kamade ower a nou ro ibose to emeiriai nio aboto.

¹⁴ Nio nakara se tu kamade mutu
ba-deremamude-mo. Nio etio ra Iesu Keriso ro
na-gidabuai, Godi edi miro ro nio abato aise
ba-mowamotiti. Nouse ie.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4